



MOCIÓN CONXUNTA DE TODOS OS GRUPOS MUNICIPAIS SOBRE O FUTURO DO SECTOR FINANCEIRO EN GALICIA

O proceso de concentración e centralización bancaria, que levou á perda progresiva de entidades como Caixa Galicia, Banco Pastor ou Banco Gallego tivo efectos moi negativos para Galicia en forma de destrución de emprego, exclusión de amplos sectores da poboación do acceso a servizos financeiros básicos e acentuación das dificultades de acceso ao crédito para o financiamento da nosa economía.

Segundo datos do propio Banco de España, Galicia está na cola do Estado español na ratio entre os aforros depositados nos bancos e o crédito concedido. É dicir, unha parte importante do aforro dos galegos e galegas, en vez de ser reinvestido no noso país, drénase fóra para contribuír ao financiamento da economía doutros territorios.

Esta situación, lonxe de corrrixirse, vese agravada con novos procesos en curso, como o ERE no Banco Santander, que xa está provocando destrución de emprego, redución do número de oficinas -polas duplicidades- e marxinación, sobre todo do rural, e dificultades de acceso ao crédito para as pequenas e medianas empresas.

No ano 2017, cando o Banco Santander comprou por 1 euro os bancos Popular e Pastor, había en Galiza 415 oficinas: 207 do Pastor; 171 do Banco Santander e 37 do Banco Popular. Cos procesos de fusión, en novembro de 2020 só quedaban 234 oficinas: 102 na Coruña; 30 en Lugo; 27 en Ourense e 75 en Pontevedra.

No que atinxe ao emprego, o cadro de persoal do Grupo Santander en Galiza era de 2.110 traballadores en 2018, ficando reducido na actualidade a 1.776 persoas. Esta situación vaise agravar coa redución de persoal acordada no Expediente de Regulación de Emprego asinado en decembro de 2020. En Galicia este ERE suporá a perda de 370 empregos e o previsible peche de 79 oficinas máis.

De feito, en Santiago de Compostela, pecharon tres oficinas do Banco Santander e está previsto pechar unha máis co novo ERE que vai afectar entre 6 e 10



traballadores/as. Segundo as previsións, estímase que vai pechar a de San Pedro de Mezonzo e abrir a de República do Salvador, que está en obras na actualidade.

A iso súmase o peche de oficinas de Abanca, onde pecharon dúas recentemente – a da Pastoriza e do Hórreo- e barállase que pechen outras dúas máis nun ERE para finais de ano, onde manteñen os novos contratos para xustificar o despedimento dos máis antigos. Lamentablemente, a fusión Caixabank – Bankia pode ter un efecto similar nas oficinas e no emprego na cidade e en Galicia.

O impacto social e económico deste proceso de concentración e centralización é múltiplo:

- Destrución de postos de traballo e precarización do emprego. Menos oficinas e menos persoal trae consigo unha maior carga de traballo para as empregadas e empregados, incerteza na mobilidade xeográfica e tamén unha maior presión sobre as traballadoras e os traballadores.

- Exclusión ou maior dificultade de acceso de sectores da cidadanía a servizos financeiros básicos, derivadas do peche de oficinas (cun impacto singular en concellos rurais), a migración aos servizos dixitais (agravando as consecuencias da fenda dixital, cun impacto singular nas persoas maiores) e o empeoramento da calidade do servizo (longas colas para entrar nas oficinas e innumerábeis dificultades para poder solucionar presencialmente as xestións).

- Un modelo de negocio afastado das necesidades da maioría social e das necesidades de financiamento da nosa economía produtiva. Orientado a dar servizo ás grandes empresas e corporacións antes que a PEMES, autónomos e particulares e a privilexiar a colocación de produtos cada vez máis complexos e de maior risco aos servizos vencellados á xestión dos depósitos de pequenas e pequenos aforradores.

Por todo o anterior, os grupos municipais do Concello de Santiago de Compostela presentan á consideración do Pleno o seguinte **ACORDO**:



1.-Expresar o apoio da Corporación municipal ás xustas reivindicacións das traballadoras e traballadores da banca en defensa dos postos de traballo e do mantemento dos servizos financeiros básicos no territorio galego.

2.-Instar ás Administracións Públicas a desenvolver, no seu respectivo ámbito de competencia, as actuacións necesarias para evitar a deslocalización de servizos e a perda de postos de traballo no sector da banca en Galicia.

3.-Instar ás Administracións Públicas a impulsar, no exercicio das súas competencias, unha regulación do sector bancario que evite os perigos da concentración e centralización, atenda as necesidades de financiamento da economía produtiva e asegure o acceso da cidadanía a servizos financeiros básicos.

4.-Trasladar este acordo ás direccións das principais Entidades financeiras que operan en Galicia para que reconsideren as súas decisións contrarias a este acordo e manteñan o servizo á súa clientela.

Santiago de Compostela, 27 de abril de 2021.

Gumersindo Guinarte Cabada
Voceiro do grupo municipal do PSdeG-PSOE

Alejandro Sánchez-Brunete Varela
Voceiro do grupo municipal do PP

Marta Lois González
Voceira do grupo municipal de CA

Goretti Sanmartín Rei
Voceira do grupo municipal do BNG